

ARUBA MERECE MIHOR



PROGRAMA DI ACCION

2013 - 2017

  WWW.MEP.AW



UN COMPROMISO SOCIAL DEMOCRATA

"Nos cu ta forma parti di e partido Movimiento Electoral di Pueblo ta kere firmemente cu e meta di tur accion publico mester ta pa logra e mayor bienestar di henter nos comunidad. Nos ta sigui kere cu firmesa den e compromiso cu nos sociedad mester sigura un nivel di bida digno pa cada ciudadano y brinda e posibilidadnan di mehoracion social mas husto, transparente y democratico. Pasobra Aruba merece mihor"

Evelyn Wever Croes
Lider di MEP

CONTENIDO

3	Gobernacion Un gobernacion mas transparente y cu respet
3	Economia Atende cu e crisis financiero Desaroyo economico y crea mas cupo di trabao Un economia familiar stabil
7	Energia Un maneho di energia sostenibel
8	Turismo Desaroyo di turismo
9	Enseñansa Enseñansa di calidad
11	Seguridad Haci Aruba mas sigur Brinda un mihor calidad di bida Un mihor futuro pa nos hobennan
14	Salubridad Mehora cuido di salud Combati adiccion
16	Infraestructura Infraestructura y medio ambiente sostenibel Un transporte y comunicacion confiabel
19	Deporte Desaroya deporte
19	Cultura Engrandece nos cultura
20	Integracion Un maneho migratorio mas humano
18	Relacion den reino Un bon relacion den den reino



INTRODUCCION

Aruba tin necesidad di un cambio, un cambio pa mas siguridad di trabao, mas siguridad financiero y siguridad fisico.

Un cambio pa mihor cuidu di esnan mas vulnerable, di nos grandinan y di salud. Un cambio pa mas empleo y pa baha costo di bida. Nos pueblo ta desea un cambio di rumbo pa sali di e crisis cu nos ta aden. Y e programa di accion cu nos ta presenta ta stipula e ruta di crecimiento economico, mas empleo y den cual ta pone e ser humano central. Nos meta ta pa crea un futuro cu perspectiva y oportunidad pa nos yiunan y nan yiunan, den un pais cu por brinda mas bienestar na su pueblo, un mihor proteccion na su ciudadanonan, un mihor cuidu di salud y un mihor calidad di enseñanza.

Lamentablemente den e ultimo 4 añanan nos a hala mas leu di e meta aki. Aruba ta den un crisis economico specialmente den nos hogarnan, un crisis social, un crisis di criminalidad, un crisis di salud y un crisis financiero. Aruba ta den gara di proyectonan dudoso, consecuencia di un maneho intransparente den ultimo 4 añanan. E desaroyo aki ta debi na e prioridadnan ekiboca di gobernacion di e ultimo 4 añanan, den cual a pone prioridad na infraestructura, pero a lubida e ser humano; den cual a pone prioridad na gastonan di luho y placer pa gobernantenan y a impone medidanan riba nos pueblo. Y gobernantenan aki awor ta pidi pa bo duna nan 4 año mas pa continua den e rumbo aki.

Partido Movimiento Electoral di Pueblo ta pone un punto final na e desaroyo negativo aki, pasobra nos ta convenci cu abo merece mihor. Pa nos saca Aruba for di e crisis, nos mester cambia rumbo di nos pais cu un programa di crecimiento y optimismo. Un programa cu ta cambia prioridadnan di Gobierno y ta pone e ser humano central atrobe. Nos ciudadanonan merece mihor. MEP lo cambia e rumbo di nos pais atraves di un programa di desaroyo economico agresivo, creando mas oportunidadnan pa inversion y pa empleo, baha costo di bida y trece un balance den finanzas publico responsabel. Y na mes momento trece transparencia den gobernacion.

Den e ultimo 4 añanan nos ciudadanonan a wordo negligisha. Nos pais mester un desaroyo economico dirigi riba brinda oportunidadnan real y duradero na nos ciudadanonan, tur esnan cu ta biba riba nos pais, sin distincion ken a nace riba nos pais of no. Pasobra ta nos responsabilidad pa cuida tur esnan cu awor ta biba riba nos pais.

Na mes momento nos mester pone orden financiero den nos pais. MEP lo maneha finanzas publico, e placa di nos pueblo, na un forma responsabel. Cu presupuestonan na tempo, realistico y balansa. Cu un plan realistico pa baha e deficit. Y cu disciplina. Mescos cu nos ta maneha finanzas den nos hogar, asina nos lo maneha finanzas di nos pais. Den nos hogar nos no ta haci gastonan cu nos no por permiti. Nos no ta corta den gastonan di educacion di nos yiunan pa nos fiesta ni biaha. Nos no ta corta den cuidu medico di nos yiunan, pa embeyece exterior di nos cas. Nos ta pone prioridad na nos yiunan, na nan bienestar. Asina nos mester maneha nos pais, poniendo prioridad na e ser humano.



Diabierna 27 di september nos tin e oportunidad pa cambia e rumbo. Den e eleccion aki nos lo determina con nos ta laga nos pais pa nos yiunan y nan yiunan. E eleccion aki lo determina si nos ta sigui den e mesun rumbo di desempleo, costo di bida halto, inseguridad, cuidu di salud deficiente, calidad di enseñanza inferior y bancarota financiero, of si nos ta cambia e rumbo di e pais pa mas empleo, pa reduccion di costo di bida, pa mas siguridad, pa mihor cuidu di salud, pa enseñanza di calidad y pa un situacion financiero stabil. Partido MEP a scoge pa cambia rumbo di e pais aki y pone e ser humano central atrobe, y nos ta invita bo pa forma parti di e cambio aki. Hunto nos ta bay padilanti, den e rumbo den cual nos lo uni nos pais y utiliza tur talento cu tin na Aruba, p'asina crea un mihor pais pa nos yiunan y nan yiunan. Pasobra Aruba merece mihor.

UN GOBERNACION MAS TRANSPARENTE Y CU RESPET

Den ultimo 4 añanan nos a conoce un gobernacion hopi intransparente, cu poco respet pa institucionan constitucional halto. Proyectonan dudoso, destaho publico a bira mas excepcion cu regla, ofertanan straño cu ta wordo acepta, consecuentemente retrasonan formal den cierto proyecto, specialmente esnan di cual e destaho no a tuma lugar.

E falta di respet mas grandi ta den Parlamento, cu ta e instituto cu mester eherce control riba Gobierno. Lamentablemente preguntanan di parlamentarionan no ta wordo contesta den gran mayoria, y oposicion ta wordo stroba den su papel pa cuestiona y controla gobierno. Fraccion di MEP a entrega varios carta di protesta al respecto, pero sin resultado.

Pueblo pa medio di eleccion democratico ta eligi su representante den Parlamento di Aruba. Representantenan di pueblo mester ta 'role model' pa comunidad. Parlamento como organo mas halto den nos constitucion mester gosa di e respet di pueblo. Respet pa miembronan di Parlamento y vice versa. Ultimo añanan e respet aki a bay perdi pa motibo di un nivel abao di respet pa otro y contenido di discusion.

MEP ta convenci cu e maneho publico mester bira hopi mas transparente y etico. Reglanan di destaho publico lo wordo enforsa. Mester atende cu corrupcion den actonan di gobierno, cu man duro y cu transparencia. Corupcion den gobernacion por costa nos pais miyones di florin, ademas cu e ta crea duda den integridad di nos gobierno y nos pais. MEP ta bay caba cu esaki. MEP ta percura pa un gobernacion transparente, caminda lo cumpli cu regla y leyman. T'asina so nos lo logra pa reforsa e legitimidad di e institucionnan publico. Un gobierno recto mester permiti pa cada instituto gubernamental traha cu tur nan autonomia y depolitisa p'asina nan por probecha di nan capacidad profesional na lo maximo y pa mehora nan recurso pa bienestar di e servicio na e usuario.

Solucion pa mas transparencia y respet

- Evalua reglanan relaciona cu destaho publico pa por elimina cualkier 'loophole' cu ta existi den su aplicacion. Gobierno di MEP lo cumpli cu e reglanan aki sin excepcion.
- MEP lo introduci e ley di financiamiento di partidonan politico.
- Introduci un codigo di etica cu lo dicta e relacion entre Gobierno y Parlamento caminda cu lo bay eherce nan trabao na un manera profesional, digno y cu respet pa pueblo di Aruba. Den esaki e Presidente di Parlamento tin un tarea importante pa guia y dirigi nos Parlamento den forma etico y adecuado. Lo aplica un maneho di un democracia bibo, transparente y participativo.
- Hisa e nivel di debate den Parlamento door di regla den reglamento di orden di Parlamento cu e ministernan tambe lo ta mara na un limite di tempo, y mester limita nan mes na e topico di debate

- Introduci un reunion regular entre e Prome Minister di Aruba y e lider o lidernan di oposicion, pa toca temanan di importancia pa henter Aruba.

- Introduci un Ombudsman pa garantiza transparencia den gobernacion, cu e tarea importante di e 'defensor di pueblo' y pa investiga tur keho di ciudadanonan contra gobierno, relaciona cu e servicio cu gobierno mester duna pueblo; esaki lo sirbi pa mehora e calidad di servicio.

- Ekipa Centraal Bureau voor de Statistiek cu suficiente material, personal y autoridad pa eherce e funcion cu Centraal Plan Bureau tin na Hulanda, pa por controla proyectonan y/o compromisonan.

- Introduci un codigo di etica cu lo dicta e relacion entre Gobierno y su departamentonan garantizando e departamentonan pa ehecucion nan trabao sin influencia politico, otro cu e guia di maneho di e minister.

- Elimina influencia politico di e proceso di nombracion di personal di gobierno.

- Pone INTEGRIDAD como un prioridad den ehecucion di e maneho di cada Minister, Parlamento y pa cada departamento di gobierno.

- Lo introduci un comision di integridad cu mester, señala, investiga y atende cu tur forma di maluzo di poder, fondonan publico, practicanan corruptivo, privilegio, conflictonan di interes den gobernacion. E comision di integridad mescos cu defensor di pueblo lo funciona independiente di gobierno.

- Aumenta conscientizacion den e aparato gubernamental con pa detecta casonan corruptivo, y stipula un 'meldcode' con pa denuncia nan, teniendo na cuenta e proteccion pa e empleado publico.

- Ahusta e reglamentonan relaciona cu medidanan disciplinario, pa por actua mas eficiente den casonan di corrupcion den gobernacion.

ATENDE CU E CRISIS FINANCIERO

Aruba ta pasando pa e peor crisis financiero den historia di nos pais. Durante e gobernacion 2009-2013 nos debe nacional a redobla, y nos a conoce deficitnan den presupuesto di mas grandi den nos historia. Talbes e problema mas serio ta debi cu Gobierno no ta publica e cifranan real, y no kier publica rapportnan. IMF a bisa bon cla cu nos no por sigui riba e rumbo aki.

Durante gobernacion actual Direccion di Finanzas practicamente a traha ariba instruccion di gobierno den un forma no transparente. Nos lo reestablece e autoridad y maneho independiente di Direccion di Finanzas y tur otro servicionan di gobierno. Tur esaki den margen di leyman y conforme e presupuesto aproba pa Parlamento. Gobierno lo haci uzo atrobe di tur su hefe di servicionan y institucionan como consehero pa loke ta maneho di gobierno. Esaki pa limita mas tanto posibel busca servicio externo y contractnan caro pa nos pais. Maneho financiero mester ta basa riba e realidad y den cuadro cu presupuesto di Aruba ta permiti!

Corta gastonan cu no ta prioridad y cu no ta trece ningun beneficio pa nos pueblo! Reduci e deficit di nos presupuesto gradualmente pa yega bek na un limite responsabel y manehabel! Asina tambe limita e necesidad pa fia placa tur aña pa cera e deficit den presupuesto! Conhuntamente cu un crecimiento di nos economia (GDP) lo traduci su mes den un rebaho di e porcentahe di nos debe relata na nos GDP.

MEP su vision riba tereno di finanzas publico ta pa pone e ser humano central. Decisionnan cu wordo tuma, lo wordo tuma teniendo e futuro di nos yiunan y nan yiunan den mente. Den e maneho financiero nos lo demostra curashi pa tuma decisionnan, pa no keda pospone pa tuma decisionnan cu mester wordo tuma, pa cambia prioridadnan, y pa bisa NO na gastonan innecesario. Nos lo maneha finanzas publico na un forma RESPONSABEL, y TRANSPARENTE, y nos lo no haci compromisonan cu nos no por paga.

Solicion pa problemanan financiero di Aruba:

• Den prome 30 dia di gobernacion un comision di expertonan Financiero Economico di nos pais lo inventarisa situacion financiero real di nos pais, y presenta nan rapport. E rapport lo contene un bista real di:

1. Gastonan pendiente y debenan hereda di Gabinete Mike Eman 2009 – 2013

2. E debenan total cu nos pais tin na banconan local y institucionan local y internacional

3. Inventarisa y revisa tur contract y nan consecucionan financiero pa pais Aruba, firma durante 2009 – 2013

4. Inventarisa y revisa tur inversion ehecuta of den ehecucion y nan consecucionan financiero pa pais Aruba durante 2009 – 2013

5. Defini y calcula e deficit financiero real den presupuesto 2013

6. Defini un plan realistico dentro di margennan aceptable internacionalmente, pa baha e debe publico

7. Ahusta Presupuesto 2013, si ta necesario, pa gobierno por prepara e presupuesto supletorio 2013 pa Parlamento trata na December 2013

8. Hunto cu un team di experto nos lo fiha e normanan cu gobierno di MEP lo aplica den cuadro di un maneho financiero responsabel pa reduci e deficit den presupuesto y pa baha e debe nacional, teniendo cuenta cu norma y desaroyonan internacional pero mas aun teniendo cuenta cu e economia di nos pais. Algo similar na e rapport di National Committee on Public Finance ("NCPF") cu a wordo publica na aña 2006. Den esaki lo pone enfasis pa sanea e situacion financiero di e fondonan di SVB, APFA y AZV.

• A base di e inventarizacion, resultado y recomendacionnan lo cuminsa deliberacionnan cu gremionan, Parlamento y pueblo di Aruba, cu lo conduci na recomendacionnan pa defini prioridadnan y areanan di atencion urgente pa e prome aña di gobernacion.

• Refinancia nos debenan den un forma cu e lo no bay afecta nos poder di compra, esta no cu medida, pero restructura e debenan di nos pais cu nos plan di rescate cual ta encera un prestamo bao di e interes cu nos ta pagando awor aki.

• Aplica un maneho di austeridad den gastonan di gobierno "top-down"; cambia e prioridadnan den gobernacion, bahando e gastonan innecesario mas tanto posibel.

• Cu disciplina presupuestario, nos lo tene nos mes na e normanan aki pa loke ta trata e deficit den presupuesto y e debe nacional; E disciplina presupuestario lo refleha den entrega di presupuesto y cuentanan anual na tempo.

• Restructura sistema di impuesto, y converti'e den uno mas sensiyoso, mas husto y mas moderno:

- Den cual tur hende lo paga impuesto di acuerdo cu su entrada, sin privilegio. Un sistema den cual e ciudadano cu tin derecho di haya placa bek, lo hay'e mas liher bek, pasobra cu ta ser spera di dje cu e mester paga otro impuesto na tempo tambe si esaki ta existi.

- Y cu ta trece entrada pa gobierno na tempo. Un sistema cu ta crea e disciplina pa tur cu mester ta contribui y na tempo. Caminda cada ciudadano y empresa ta carga su responsabilidad.

• Un sistema cu ta pone enfasis riba e impuesto indirecto, y lo reduci e impuestonan directo, y na mes momento implementa un sistema di control riguroso pa sigura cu tur contribuyente ta paga locual nan mester paga y dentro di e tempo cu nan mester paga. Den esaki lo tin un atencion special pa impuesto riba pensioen di biehes, p'asina reduci e peso di impuesto cu nos pensionadonan mester paga.

• Un sistema di impuesto cu lo atrae inversionistanan serio, cu ta dispuesto pa contribui na caha di gobierno.

• Lo restructura Departamento di Impuesto y dune bek e lugar y e respet pa e por traha responsabel, eficiente, transparente y independiente manera cu ley ta prescribi.

• Lo sondea un sistema di restructuracion di e (HA)BRA p'asina bin cu un sistema na unda gastonan di personal por wordo maneha miho, acoplado esaki na productividad mas halto, pero na mes momento dunando e empleo publico locual e tin derecho riba dje.

• Nos lo maneha e gastonan publico na mes forma cu ta maneha gastonan den un hogar. Den momentonan di austeridad lo corta cu gastonan luhoso, entre otro coordinadonan, presupuesto di biahe y fiestamento, gastonan di luho. Lo hala faha mara, pero lo cuminsa cerca e gobernantenan prome.

Nos meta ta pa pone orden financiero den nos pais, y baha e debe cu tin riba lomba di nos yiunan y nan yiunan.

DESARROYO ECONOMICO Y CREA MAS CUPO DI TRABAO

E crecemento economico di Aruba premira pa e aña aki di 5,1% a wordo ahusta recientemente na 2.6% cual lo por a significa un crecemento leve. Sinembargo desde ciere di refineria Valero na november 2012 nos economia a stagna, varios negoshi a cera y miles di mama y tata di famia ta sin trabao. E desaroyo den centro di Playa a haci e situacion pio, debi na e atraso formal den e proyecto di embevecemento di Caya Betico Croes. Segun ultimo cifranan publica e desempleo ta 10%, sinembargo nos sondeonan ta muestra cu tin un cantidad grandi di desempleo scondi. Desempleo ta halto tambe bao di nos hobennan.

MEP ta kere cu e base pa un recuperacion di nos pais ta sinta den mehoracion di e economia na forma sostenibel y productivo y creando mas cupo di trabao pa esnan cu ta desemplea actualmente. E inversionnan haci te cu awor door di e gobierno actual tabata den infraestructura di nos pais y no tabata productivo ni sostenibel. Cu nos economia no ta muestra un crecemento real ta debi na factornan internacional, sinembargo tin varios factor cu nos mes por controla.

MEP ta di opinion cu nos mester fortifica nos base economico awor, pero tambe diversifica nos economia, y na mes momento crea cuponan di trabao.

Solucion pa fortifica e base economico existente:

- Pone tur esfuerso den reapertura di e refineria, pasobra esaki lo genera cuponan di trabao inmediato; algo cu ta un necesidad grandi awor aki. Pa reapertura di e refineria lo tene cuenta cu nos medio ambiente, necesidad pa crea cupo di trabao pa esnan cu actualmente ta desemplea, e refineria mester contribui cu un entrada husto pa e pais;
- Fortifica e pilar economico di servicionan financiero, teniendo cuenta cu regulacion internacional, pero creando un mercado 'niche' financiero cu instrumentonan financiero moderno y atractivo, sin perde for di bista e papel importante cu por ehempel Free Zone Aruba por hunga den esaki;
- Introduci estimulonnan fiscal di inversion pa incentiva comercio local pa inverti den nos economia, por ehempel pa facelift e propiedad, pa emplea mas hende.

Solucion pa trece tranquilidad riba mercado laboral y aumenta productividad

- Departamento di Labor mester hunga un papel mas activo den brinda asistencia na empleadonan, specialmente esnan cu haya nan den un conflicto laboral y ta core riesgo di keda sin trabao, pero tambe pa yuda esnan cu ta na cas sin trabao.
- Mester bin un maneho mas activo pa logra haya trabao pa un persona, specialmente den caso cu ta un persona cu onderstand. Esaki mester wordo combina cu om-, bij-, of herscholing di e hendenan cu ta sin trabao.

- Introduci programanan dirigi riba inclui mas hende muhernan den mercado laboral.
- Introduci posibilidad pa traha menos ora; experiencia den otro pais a demostra cu esaki a contribui na aumento di productividad.
- Consulta regular cu sindicatonan, y duna sindicato participacion real na dialogonan.

Solucion pa diversifica nos economía y crea mas cupo di trabao:

- "MADE IN ARUBA": fabricacion di productonan traha na Aruba lo crea un pilar economico nobo, creando cuponan di trabao. Aki ta pensa riba productonan cu nos ta uza frecuentemente na Aruba, por ehempel cups, napkins, etc. Tambe productonan di agricultura y di pesca, y productonan di artesanía; nos lo protega nos mercado local pa e productonan aki y na mes momento garantiza cu e productonan no ta bira mas caro.
- Introduci un BANCO DI DESARROYO pa stimula un generacion nobo di empresarionan local, riba nivel chikito y mediano, creando cuponan di trabao. E Banco aki no solamente lo financia empresanan y fabricanan chikito y mediano, sino a traves di un agencia di apoyo lo crea posibilidadnan pa garantiza e empresario cu e guia necesario pa e ta exitoso.
- Amplia e pilar economico di servicio, cu SERVICIONAN LEGAL INTERNACIONAL, haciendo uzo di e posicion geografico di Aruba, y crea un Instituto di Arbitrahe Arubano ("IAA") cu ta un alternativa pa companianan Mericano y Europeo cu ta inverti den Latino y Sur America, cu na momento di disputa entre e compania y e gobierno di e pais ta scoge pa e Instituto di Arbitrahe di Aruba.
- Desaroya "AGRICULTURA, CRIA Y PESCA" den un pilar economico. Desaroyonan mundial ta indica cu e necesidad pa un pais percura pa su propio cuminda ya no ta un luho. Gobierno di MEP su rol ta pa stimula desaroyo riba e ramo di agricultura, cria y pesca y den cuadro aki MEP lo traha den cooperacion cu Gobierno Hulandes y otro instancianan internacional.
- Desaroya e pilar di TURISMO MEDICO y desaroya Aruba como centro di tratamiento of cirugianan estetico, y centro odontologico. Haciendo uzo di e situacion geografico privilegia di Aruba y teniendo e gastonan na nivel competitivo, por desaroya Aruba den un centro estetico y na mes momento brinda e oportunidad na e pashent turista pa relaha.

Creando mas pilar economico y estimulando mas empresa y fabrica local, manera describi aki riba, lo crea miles di cupo di trabao den diferente area, manera recreacion pa turismo, refineria, agricultura, cria y pesca, comercio di servicio, industrianan chikito y mediano di productonan pa e mercado local, industria y cultura.

Nos compromiso ta pa stimula nos economia, crea mas pilar economico, p'asina crea mas cupo di trabao; mama- y tatanan di famia merece tin un trabao pa nan por mantene nan famia y brinda perspectiva y oportunidad na nan yiunan.

UN ECONOMIA FAMILIAR STABIL

Costo di bida a aumenta drasticamente ultimo añanan. Esaki ta debi na algun factor: costo di comestibel, costo di utilidad y costo di transporte cu a aumenta. E aumento drastico di costo di bida a ocasiona hopi problema social den nos comunidad, y hopi pobreza. Placa no ta yega mas pa cubri tur gasto fin di luna y debi na esaki tin aproximadamente 6 mil persona sin coriente na e momentonan aki; esaki ta 6% di nos poblacion. Tin mas di 3 mil persona ta depende di Fundacion pa nos Comunidad, pa por pone cuminda riba mesa pa nan yiunan, esaki ta 3% di nos poblacion.

MEP ta consciente cu no por tin progreso si solamente mehora entrada di comerciante y trahador, mientras e costo di bida na Aruba mes ta sigui aumenta. Nos mester baha e costo di bida, pasobra e ta kibrando nos famianan y ta poniendo hopi famia na margen di nos sociedad. Y na final ta nos muchanan ta sufri e consecucionan.

Ningun pais por yama su mes un pais desaroya, cu e cantidad halto describi aki riba. Ta pesey MEP ta presenta solucionnan pa e problemanan aki. Solucionnan pa baha costo di bida y crea mas cupo di trabao.

Solucion pa baha costo di comestibel:

- introduci un control mas riguroso y confiabel di prijsnan den supermercadonan, pasobra e diferencia den prijs actualmente ta demasiado y den caso cu ta necesario introduci leyman special den

cuadro di hiba un maneho di prijs riba productonan p'asina realisa un poder di compra mas husto.

- Amplia e canasta basico cu mas producto cu ta haci cu Gobierno tin control riba e prijs.
- Stimula agricultura, cria y pesca, y comercialisa esaki p'asina baha e dependencia di importacion di cierto berdura, carni y cuminda di lama.
- Ekipa Fundacion CAS pa por eherce mihor control, y pa tin un bos mas fuerte den e proceso di proteccion di consumidornan.

Solucion pa baha costo di awa y coriente:

- Explora forman di energia alternativo cu mester reduci gastonan di awa y coriente inmediatamente. E solucion mas practico y menos costoso ta pa importa hidro energia di paisnan den nos region, atraves di un kabel.

Solucion pa baha costo di transporte:

- Explora e posibilidad di importa gasolin di paisnan den nos region, caminda prijs di gasolin ta mucho mas abao cu aki na Aruba y di mihor calidad.

Nos compromiso ta pa baha costo di bida, pasobra un pais no por progresa sin cu baha costo di bida.



UN MANEHO DI ENERGIA SOSTENIBEL

Aruba mescos cu resto di mundo den ultimo añanan a busca alternativanan pa energia cu ta depende di petroleo. Na año 2004 nos compania di utilidad WEB NV a inicia un proyecto pa baha e dependencia riba fuel oil. Nos ta referi aki na e proyecto inovativo di 'Reverse Osmosis' pa produci awa y e generadornan Recip pa produci coriente. Despues di 2009, ningun paso concreto mas a wordo tuma pa sigui encamina e ruta pa bira menos dependiente di fuel. E gobierno actual a papia hopi riba e tema, a reuni hopi, a organisa hopi conferencia, a gasta hopi placa na esaki y a fiha metanan hopi ambicioso su dilanti, pero no por a produci nada concreto ainda.

Mientras tanto mas y mas estudio ta indica cu molinanan di biento por causa problema na salud di hende. Peseyp partido MEP a bay en busca di alternativanan cu no ta afecta salud di hende, y no ta causa un impacto negativo riba medio ambiente. MEP a bay en busca di energia principalmente pagabel door di cada ciudadano. E realidad cu nos ta biba aden ta cu tin 6000 persona ta biba sin coriente, debi cu costo di bida a aumenta demasiado.

Solucion pa problemanan actual

- Introduci un areglo social real pa tur cu ta den necesidad, specialmente esnan cu ta biba di onderstand.
- Introduci reverse meters pa cu coriente pa reduci asina gastonan di uzo di coriente na unda e habitante cu por inverti den electricidad di su mesun cas, ELMAR lo por cumpra esaki bek door di e reverse meter.
- Evalua e proyecto di molina di biento di Vader Piet specialmente riba impacto riba salud di esnan cu ta biba den e area.

Solucion pa un maneho energetico mas sostenibel

Na momento di busca formanan di energia alternativo, tin dos punto di salida crucial pa tene cuenta cune:

- E forma di energia alternativo mester reduci gastonan di awa y coriente inmediatamente.
- E forma di energia alternativo cu scoge no por tin un impacto negativo riba nos comunidad.

Un di e formanan di energia alternativo cu ta cumpli cu ambos condicion ta e plan pa riba termino corto importa hidro energia di paisnan den Sur America, atraves di un kabel submarino. Un tecnologia aplica na diferente pais na mundo y completamente confiable. Hidro energia ta mas barata actualmente cu genera energia di biento, di solo of cu gas.

Ehecucion di e plan aki lo exigi un inversion cu no ta surpasa e inversion planea pa e di dos parke di molina di biento na Urirama, mientras cu e plan aki lo reduci costo di awa y coriente na mitar di e costonan actual y lo no tin un impacto negativo riba nos comunidad; cu esaki e di dos parke di molina di biento na Urirama no ta necesario mas.

Algun di e beneficianan principal ta:

- E ta baha prijs di awa mesora te na mitar; e parke di molina na Urirama NO ta baha prijs.
- E no ta afecta e area di Urirama ni Alto Vista y no ta afecta habitantenan di Noord.
- Nos no mester warda te 2020, esaki ta un proyecto cu ta keda cla den 2 año, pues den año 2015.
- Cu esaki iniciativanan di fabricacion of produccion, entre otro refineria, na Aruba ta bira mas factibel, pasobra e gastonan di produccion ta baha, dunando asina un boost mayor na nos economia.
- Cu e tipo di energia aki nos por genera un economia nobo, creando mas cupo di trabao.

MEP ta convenci cu e solucion aki ta esun mas sostenibel, mirando cu e ta un forma di energia limpi, y na mes momento ta pagabel pa cada ciudadano, y pues sostenibel. Cu esaki MEP ta logra pa reduci costo di bida. Energia alternativo ta keda riba agenda di gobierno semper y cuando cu esaki ta na beneficio di pueblo y sin consecuencia negativo pa nos medio ambiente.



DESARROYO DI TURISMO

Ta obvio cu despues di e ciere di Valero cu e industria di turismo ta Aruba su unico pilar economico na e momentonan aki. Hopi enfuerso a wordo dirigi pa hisa e cantidad di bishitantenan, pero a perde e calidad di nos bishitantenan for di bista y poco atencion a wordo duna na evalua kico ta necesario pa cu e productividad di e industria aki mirando cu turismo na Aruba ta saturando. Aruba ta sinti esaki pa e hecho cu menos placa ta keda atras mirando cu bishitantenan ta gastando menos placa mientras nan ta na Aruba y specialmente tur tendencia ta mustrando cu bishitantenan ta bin mas y mas cu paketenan prepaga y un cantidad significativa ya ta bin Aruba cu paketenan "All-inclusive". Esaki ya ta bahando e rentabilidad di placanan cu tin disponibel pa mercadea nos pais, cu ta dobel mas cu añanan atras. Apesar cu e cantidad di turistanan stay-over a crece, e crecimiento aki no a traduci su mes den crecimiento di GDP. Di otro banda, e cantidad di 'calls' di barco di crucero, y e cantidad di turistanan crucero a baha. E desaroyo aki ta preocupante y mester di mas atencion.

Mester duna mas atencion con pa yega na un mihor mix di mercado cu Aruba lo atrae pa nos desvia nos dependencia riba algun mercado so, haciendo nos economia mas vulnerabel pa loke por pasa na e paisnan aki y nan economia. Ultimo cifranan ta muestra cu hasta nos bishitantenan di Merca ta concentra practicamente pa 75% riba e area Noroeste so di Merca. Mirando cu awor tin mas fondo disponibel pa mercadeo y promocion, haci pa cada florin bal mas na e momento di inverti den mercadeo.

Aruba ta ser mira y categorisa como un destinacion caro den region. Mas cu mita di su bishitantenan mes ta indica esaki. Awor mas ainda mirando e medidanan fiscal cu a wordo introduci cu ta impuestonan directamente riba e bishitantenan. Otro area di preocupacion ta siguridat cu Aruba por ofrece su hendenan pero tambe su bishitantenan. Mas y mas ta registra casonan di robo y atraco riba nos bishitantenan, cu por pone cu Aruba ta perde e imagen di ta un destinacion safe pa biaheronan.

MEP lo no solamente concentra riba crecimiento den cantidad pero tambe hisa e calidad di nos bishitantenan dirigiendo esfuersonan pa atrae bishitantenan cu por gasta mas na Aruba.

Solucion pa optimalisa e productividad den e industria turistico

- Dirigi esfuersonan pa atrae bishitantenan di edad poco avansa y di esnan cu ta gosa di mas entrada, cu por duna como resultado cu nan lo por gasta mas na Aruba.
- Consolida mercadonan rendabel y diversifica mercadonan incluyendo mercado Mericano.
- Studia posibilidad di destinacionnan relata na conexionnan aereo disponibel incluyendo paisnan den Europa y Latino Americano, specialmente Brasil y Chile.
- Studia posibilidad di diferente "niche" markets pa Aruba.

- Converte bishitantenan crucero den bishitantenan "stayover".
- Stimula y atrae bishitantenan pa temporada abao pa no elimina fluctuacion drastico entre temporada halto y temporada abao.
- Promove y stimula posibilidadnan comercial turistico pa produci mas empleo y cupo di trabao nobo, y metodonan mas creativo y eficiente digital pa promove y mercadea Aruba, a base di comportacion y tendencianan di biaheronan cu mester wordo studia na un manera structura pa realisa uzo di fondonan mas efectivo.
- Fortifica relacionnan cu agentenan di biahe cu ta duna e toke mas personalisa pa promove nos pais como destinacion.
- Reevalua medidanan fiscal directo y indirecto riba bishitantenan y su efecto riba e industria y relata na e imagen cu Aruba ta un destinacion caro.

Solucion pa optimalisa e imagen di producto Aruba

- Introduci of stimula programanan di training den servicio pa garantiza y mantene calidad di servicio den e sector turistico y pa mantene Aruba su identidad di ta un destinacion hospitalario.
- Impone medidanan di siguridat den areanan frecuente pa nos bishitantenan pa garantiza un miho siguridat incluyendo mas of mihor iluminacion y uzo di cameranan di siguridat y vigilancia.
- Garantisa un bon experiencia na e bishitante resultando den e miho referencia of propaganda personal di boca pa boca y estimulando y incentivando e bishitante pa propaganda Aruba na nan famia y amigonan.
- Sondea e posibilidad di atraccionnan cu cada barrio di Aruba tin di ofrece como producto turistico p'asina educa y informa nos bishitantenan di e producto y identidad di Aruba mas holistico
- Apoya y stimula productonan y actividadnan local y cultural, manera pica di papaya, artesanian, grupo di baile folklorico, festivalnan, Parke Nacional Arikok, etc., dunando asina e producto turistico mas contenido y autenticidad pa engrandece nos cultura.

Solucion pa mehora turismo crucero

- Percura pa atrae mas lineanan crucero durante henter aña p'asina minimalisa/termina cu e fenomeno di "off season".
- Estrecha nos lasonan cu tur compania y stakeholders den e industria di crucero, p'asina ta altante di tur desaroyo di y den e mundo crucero.
- Promove Aruba como homeport y percura pa mehora e infrastructura den nos waf y pafor pa por garantiza nos empeño continuo di mehoracion di e producto Aruba.
- Inicia , sondea y haci tur contacto posibel pa atrae e mercado di yate y mega yate, cu ta un mercado hopi lucrativo.

- Pone un énfasis grandi ariba airlift, creando pakete di incentivo tanto pa e industria di crucero como aereolineanan, p'asina incentiva nan pa keda bini Aruba y logra pa interesa otronan.
- Contacto directo y continuo cu tur involvi den e industria, tanto internacional como local ta di inmenso balor.

Nos lo lucha pa mantene e producto turistico Aruba na un nivel di calidad y haci e industria aki mas productivo y rendabel mirando su estado di saturacion na e momentonan aki.

ENSEÑANSA DI CALIDAD

Enseñansa ta probablemente e area cu a wordo mas negligisha ultimo añanan. Aparte di algun proyecto di inovacion den enseñansa, cual no a duna e frutonan spera, no tabata tin atencion serio pa e calidad di enseñansa. Docentenan ta haya nan confronta cu hopi problema social, siendo cu nan no ta prepara p'e, y gran parti di nan tempo pa duna les, ta bay na atende e problemanan aki. Enseñansa na Aruba ta birando demasiado caro, y studentenan cu bon prestacion ta wordo forsa di bandona nan estudio pa motibonan financiero. Aruba tin necesidad urgente na mas scol secundario, pasobra no tin cupo pa tur estudiante na e scolnan di HAVO ni MAVO den vecindario di nan cas.

Nos mester reforma nos sistema di e enseñansa fundamentalmente. Aparte di esaki tin hopi problema cu mester wordo soluciona den corto tempo y otronan a largo plaso na bienestar di e calidad di educacion pero principalmente educacion di cada yiu di tera. Nos a yama nos vision "Flip (Top –Bottom effect)", Nos lo duna mas atencion na nos Departamento di Enseñansa y na formacion y forma di pensa di nos docentenan. Pasobra un pueblo educa, ta un pueblo cu vision y un pueblo cu futuro. Educacion ta e forma mas efectivo pa combati pobreza y problemanan social.

Solucion pa reforma enseñansa

- Idioma Papiamentu mester wordo introduci den scolnan den un tempo mas corto, contrario na e protocol firma entre e gobierno actual y gobierno Hulandes cu lo duna e idioma Hulandes e rol principal;
- Mester duna e implementacion di Papiamentu na scolnan su debito atencion y prioridad, alocando fondonan pa por realiza esaki
- Digitalisa enseñansa:
 - Mester cuminsa cu formacion di docentenan na IPA pa prepara nan pa Enseñansa digitalisa
 - Mester introduci internet den tur scol, smart boards – digi boards, y material di scol mester ta den tablets y i-pads
 - Institui un Fondo Nacional pa Inovacion di Enseñansa, banda di e fondo di Enseñansa regular

- Cambia structura di curiculo y orario di scol;
 - Ciencia a muestra cu movecion ta hopi importante. Nos lo habri tur dia di scol cu movecion durante un lesuur; naturalmente mester ahusta e infraestructura di scol tambe pa por logra esaki
 - Amplia e orarionan di scol te atardi, y duna materianan manera arte, musica, arte visual, den oranan despues di merdia. Tambe lo siña e alumno con pa argumenta/debati, pa e siña con pa defende su mes (pa alumnonan di scolnan basico)
- Cambia sistemanan actual di Enseñansa profesional y dirigi'e riba necesidad di trabao na Aruba.
 - Reorganisa structura di MAVO y EPB, y combina nan den VSBO. Despues di e ciclo basico di 2 aña cada alumno lo sigui den e richting cu e por sigui; esaki ta facilita instroom na p.e. EPI
 - Reorganisa sistema di estudio, principalmente EPB y EPI, y introduci dos facultad nobo den Enseñansa profesional (EPB y EPI) y Universidad:
 - SIOS, estudio di movecion, pa duna realse real na e importancia di movecion.
 - ICT, e ramo cu ta brinda mas perspectiva pa futuro
- SOLUCION pa eleva calidad den Enseñansa:
 - Duna Departamento di Enseñansa e maneho di nos enseñansa bek, p'asina logra un "top-down effect". Nos lo ekipa cada departamento di Enseñansa pa por traha efectivamente, ekipa Departamento di Inspeccion pa por supervisa e calidad di enseñansa miho, mehora funcionamiento di e departamento curriculario y introduci un departamento di IT pa cuminsa e proceso di modernizacion di enseñansa, y specialmente pa prepara e docente pa duna les den e era digital.
 - Brinda mas asistencia social na tur scol pa atende cu problemanan social y pa brinda mas siguridad na alumno y docentenan. Asina e docente lo tin mas tempo pa por duna les. Atencion special lo wordo duna na un maneho nacional riba 'bullying' of termento.
 - Busca mas maestro pa reemplaza un maestro cu ta malo, y haci mas uzo di un asistente den klas unda esaki ta rekeri.
 - Lo bin cu supervision y control di e crèchenan pa garantisa enseñansa di calidad for di edad hopi jong y lo yuda mayornan cu no tin modo financiero, cu un ayudo social pa por paga e crèche.
 - Pa local ta Scol Preparatorio, percura pa mas uzo di digitalisacion den enseñansa preparatorio, y percura cu e kleuter por gosa di tur facilidad pa por move y pa tin un klas safe y atractivo.
 - Mehora calidad di enseñansa na scolnan basico y introduci material interactivo, yamativo y contextualisa na e situacion di Aruba.

ENSEÑANSA

- Mehora calidad di enseñansa na scolnan special y amplia e capacidad na e scolnan, y ekipa e scolnan special cu maestro pa e grupo di alumnonan special cu multiple deficiencia e.o. muchanan autista, cu tin deficiencia motriz, senso-motriz y cu ta parcialmente limita fisicamente.
- Mehora calidad di enseñansa den scolnan secundario y avansa:
 - Traha riba e motivacion di docentenan y brinda cursonan di re-capacitacion pa docentenan
 - Traha riba e motivacion di e studiantenan pa combati e fenomeno di "drop outs"; aki mester evalua metodonan mas moderno, manera tablets, digiboards
 - Amplia cupo na scolnan HAVO/MAVO pa medio di construccion di e scol HAVO na Noord, un scol MAVO na Paradera y riba termino mas largo un scol MAVO den e area di Savaneta/Pos Chikito
 - Sigui eleva e calidad di e producto di IPA y prepara studiantenan di IPA pa por integra den e mundo di nos hobennan
 - Crea mas posibilidad di estudio na Aruba specialmente pa esnan cu no por bay sigui studia den exterior, y esnan cu awor no ta logra e normanan cu por ehempel EPI ta impone pa por continua un estudio eynan despues di MAVO
 - Amplia e posibilidadnan di enseñansa pa adultonan pa siña un ofishi; asina nan por percura di biaha pa nan por tin un trabao den e ramo cu nan a studia.
- Reevalua e sistema di normering pa bay over, debi cu esaki ta perhudica e estudiante y ta costa hopi placa.
- Enfoca riba educacion como vehiculo pa yuda nos hobennan cu tin posibilidad grandi di cay den mal rumbo "Scol tin Bida". Hopi

di e hobennan problematico ta bin di mayornan cu problema, y mester kibra e circulo vicioso aki pa medio di educacion. Tambe amplia e posibilidad di enseñansa den KIA.

- Mehora infraestructura y siguridad na scolnan, y haci mantenion na nos scolnan structuralmente.
- Sigura cu studiantenan bolbe Aruba bek despues di nan estudio:
 - Evalua pa otorga fianza di estudio pa estudionan cu cual e estudiante despues por bolbe Aruba pa e traha y tin trabao pe; esaki ta exige un estudio elabora di e necesidadnan riba mercado laboral riba termino corto y termino largo, pa brinda perspectiva na e studiantenan
 - Duna incentivo adicional na studiantenan cu bay studia den region
 - Facilita e estudiante pa percura cu e ta caba di studia na tempo
 - Garantisa nan e trabao cu nan a bay studia p'e, bao condicion cu nan termina nan estudio na tempo
 - Duna dispensacion parcial di fianza di estudio como estimulo pa bolbe Aruba y bin traha
 - Haci e pago di fianza di estudio deducible fiscalmente
- Haci enseñansa accesible pa TUR estudiante, esnan di menos recurso lo ricibi un subsidio cu realmente ta tene nan na scol, y lo reduci e prijs di Staatsexamen cu awo ta un estorbo pa esnan di menos recurso.

Nos prioridad ta educacion. Educacion ta E solucion!



HACI ARUBA MAS SIGUR

E naturaleza di criminalidad na Aruba a cambia hopi den e ultimo añanan aki. No solamente cierto delitonan a aumenta sino tambe e crimen organisa a cuminsa haya forsa. Atraconan arma ta tumando lugar cu arma sumamente sofisticada. Un averahe di 16 auto ta wordo horta pa dia. Den un luna e aña aki nos a conoce 4 asesinato. Atraconan ya no semper ta wordo raporta na Cuerpo Policial mas, pasobra Cuerpo Policial no ta atende cu tur. "Poverty is the mother of all crimes", y e realidad ta cu tanten cu nos no tin desaroyo economico real, tanten cu nos tin hopi pobreza, e problemanan di criminalidad lo sigui aumenta. Pero esey no ta motibo pa sinta man crusa.

MEP lo percura pa tur e actornan riba e tereno di Husticia funciona optimal. MEP tin e determinacion pa combati criminalidad cu man duro. Cu un plan ambicioso, pero realistico MEP lo haci Aruba mas sigur, cuminsando cu control severo di nos costanan, y unabes nos costanan ta controla, MEP lo pone orden paden (den cas) y lo enfoca mas riba prevencion. Pasobra tanten cu arma, droga y personanan sigui drenta Aruba na forma ilegal y sin control, bo no por pone ordo den cas. MEP lo haci Aruba un lugar mas sigur pa un y tur, y lo promove husticia den tur sentido. Legalidad riba ilegalidad.

Solucion pa problemanan di criminalidad:

- Institui un plataforma nacional consistiendo di tur departamento cu mester atende cu criminalidad y profesionalisa e departamentonan mas ainda: Cuerpo Policial, Ministerio Publico, KIA, CEA, Re-classering, Departamento di Asuntonan Social, Inmigracion, Warda nos Costa, Aduana. Den e plataforma aki lo tuma e decisionnan pa un Aruba mas sigur, y e decisionnan aki mester wordo ehecuta cu prioridad halto.
- Inverti den material, ekipo, training y tecnologia den uzo efectivo pa e departamentonan aki por combati criminalidad.
- Control estricto di nos costanan, pa detecta y actua mesora contra importacion ilegal di droga, arma y hende, pa medio di entre otro radarnan, Polis Maritimo, Warda nos Costa, Inmigracion, Aduana.
- Introduci programanan pa crea e confianza bek den Cuerpo Policial, y pa trece e respet bek den e Cuerpo y pa e Cuerpo.
- Maneho lo concentra riba PREVENCIÓN, enbes di e maneho di represion. Mas "blauw" riba caya. Polis di barío mester wordo fortifica cu material y personal pa por traha efectivamente; polis di barío mester traha hunto cu gruponan consistiendo di bisñanan den barío pa vigila den barío.
- Aumenta siguridad inmediatamente den e area turistico, apuntando agentenan policial exclusivamente den areanan turistico y hotelero, canando rond of riba 'segways', of moviendo den aparatonan mas moderno manera e "T3 Patroller", p'asina nan por tin contacto cu e turista, y e turista por sinti'e mas sigur. Tambe lo bin cu e proyecto di camera den e area turistico, pa mihor vigilancia.



- Den e maneho lo pone un enfasis particular riba e productividad, eficiencia y satisfaccion den trabao di e Cuerponan uniforma, dunando e trato husto y humano na cada ser humano y den cual e victima mester sinti cu tin oido y atencion pa su problema.

- Esun cu viola ley mester haya e castigo husto pa e crimen cu el a comete, y despues mester wordo brinda e oportunidad pa rehabilita realmente y atraves di programanan di apoyo laboral pa nan por integra den sociedad cu un trabao; na mes momento yuda nan famia pa e reintegracion di nan familiar despues di sinta su castigo. Atencion special lo wordo duna na agresornan den caso di violencia domestico y violencia sexual, pa haya ayudo psyo-emocional y asina evita repeticion.

- Crimennan sexual contra menornan di edad y hendenan muher lo conoce castigonan mas severo, y lo publica identidad di e agresor; Importante den e cuadro aki ta pa introduci proceduranan pa yega na acumulacion di prueba mas liher.

- Introduccion di prueba di identidad obligatorio pa haci posibel e trabao di control di polis riba violacionnan relaciona cu edad, por ehempel, benta di alcohol na menornan di edad.

Solucion pa brinda mas proteccion huridico na ciudadanonan:

- Haci Corte den Prome Instancia mas accesible pa ciudadanonan di menos recurso, amplia e posibilidad di abogado liber y rebaho di griffie geld.

- Institui un tienda di ley involucrando studiantenan di ley di Universidad di Aruba pa duna conseho gratuitamente y/o defende casonan pro deo bao guia di un patron of docente.

- Cambia e Landsverordening Administratieve Rechtspraak y Landsverordening Ambtenaren Rechtspraak pa brinda mas proteccion na e ciudadano o empleado publico, specialmente den caso cu gobierno no tuma decisionnan of no tuma decision na tempo.

- Ekipa 'Directie Wetgeving en Juridische Zaken' cu mas hurista pa specialisa y defende casonan pa gobierno riba tereno di LAR, Ley di Ambtenaar y riba tereno di casonan civil, y asina baha gasto cu gobierno ta paga na oficinanan di abogado.

BRINDA UN MIHOR CALIDAD DI BIDA

Pobresa a crece exponencialmente den nos pais den e ultimo añanan. Mas di 750 mucha ta haya desayuno danki na Fundacion Ban Uni Man pa nos Muchanan y tin mas di 3 mil persona ta depende di Fundacion pa nos Comunidad pa por haya cuminda riba mesa, di cual mitar ta mucha. Pobresa ta trece cun'e hopi problema social, den cual esnan mas vulnerable den nos comunidad ta sufri, nos muchanan, mamanan soltero y nos grandinan. Cu e rapport recien di UNICEF a keda prueba cu derechonan di mucha na Aruba ta wordo viola, algo cu ta totalmente inaceptabel. 1 di cada 10 yamada na Telefoon pa Hubentud ta relata na abuso domestico y/o sexual, y apesar cu a papia hopi riba combatimento di e abuso aki, de facto no mucho a wordo haci den e ultimo añanan. Di otro banda e castigonan den caso di abuso sexual ta varia hopi y den gran mayoria di caso, nan ta demasiado abao. Nos hobennan a wordo negligisha den e ultimo cuater añanan y consecuentemente e posibilidad di desaroyo y di acceso na recreacion, practica un deporte y desaroya talento pa medio di diferente manifestacion artistico y cultural, a wordo disminui. Mama y tatanan soltero mester lucha contra un sistema social burocratico, en bes cu e sistema ta lucha pa nan. Cuido di nos adultonan mayor no ta hayando prioridad y tampoco nan cuidado di salud, mientras cu mas y mas e respet pa adultonan mayor ta birando menos.

MEP ta consciente cu nos mester cambia e rumbo aki. Un pais cu ta respeta su mes, no por bira cara pa problemanan social di un pais. Inversion den infraestructura di un pais, no por wordo considera exitoso, si na mes momento ta negligisha inversion den e calidad di bida di ser humano. MEP ta reconece e importancia di tratadonan internacional y lo traha pa implementa nan, p'asina percura pa ningun hende biba den e margen di nos sociedad.

MEP den gobierno lo ekipa y reforsa tur e departamentonan pa nan por eherce nan tareanan manera debe ser, y por duna asistencia social na esnan cu tin mester, inmediatamente.

Solucion pa problemanan social en general:

- Reevalua e sistema di duna 'onderstand'; tin hende ta abusa di dje debi na falta di control, mientras tin otronan cu tin mester di 'onderstand' no por hay'e.
- Yuda esnan mas vulnerable den nos comunidad cu asistencia efectivo y duradero pa nan no cay den mas problema, por ehempel cu pago di cas social, cu pago di awa y coriente.
- Institui un ekipo di trahadornan social cu ta mas riba 'field' pa por evalua realmente ken tin mester di asistencia social, y den caso cu nan tin mester, nan ta wordo yuda inmediatamente.
- Institui un departamento di famia, p'asina traha riba maneho con pa fortifica e nucleo familiar.

Solucion pa problemanan cu nos mucha y hobennan:

- A base di un esfuerzo nacional, den combinacion cu e instancianan den sector Social y Husticia, crea programanan dirigi riba hobennan cu problema di conducta violento.
- Enfoca atencion riba e problemanan pa cu alimentacion pa un yiu y e suma di alimentacion.
- Introduci un protocol estricto den caso di abuso sexual di menor y pa brinda mihor proteccion na muchanan y sosten na e victima y su famia, y conscientisa nos comunidad cu e tipo di abusonnan aki no ta aceptable y ta wordo castiga severamente; evalua leyman existente pa introduci castigo mas severo den caso di abusonnan sexual contra menor.
- Ekipa nos pais cu mas psiquiatra pa mucha, pa por atende cu e problemanan psiquiatrico den muchanan den un etapa trempan y bin cu programanan psicologico, pa yuda muchanan, hobennan y muhernan cu ta victima di abuso di tur tipo.
- Aumenta conscientisacion bao di nos hobennan di e consecuencianan di embarazo hubenil.
- Pone atencion na control riba centronan cuta cuida baby, manera 'creche'.

Solucion pa problemanan di hende muher:

- Introduci un plataforma pa combati discriminacion entre hende homber y hende muher. Punto di salida ta derecho igual, pago igual pa trabao igual y mesun oportunidadnan pa cierto specialidadnan riba tereno di trabao.
- Introduci un protocol estricto den caso di abuso fisico y sexual di hende muher y pa brinda mihor proteccion na hende muher y sosten na e victima y su famia; pa conscientisa nos comunidad cu e tipo di abusonnan aki no ta aceptable y ta wordo castiga severamente; evalua leyman existente pa introduci castigo mas severo den caso di abusonnan fisico y sexual contra hende muher, tambe den matrimonio.
- Aumenta conscientisacion den nos comunidad cu abuso di hende muher, tambe bao di nos hobennan, no ta aceptable.

Solucion pa problemanan di esnan fisicamente y/o mentalmente incapacita:

- Crea mas facilidad pa cuidado y desaroyo di esnan cu incapacidad fisico y/o mental, y centronan di rehabilitacion cu cuidado profesional.
- Elimina discriminacion contra esnan cu un incapacidad na pia di trabao y crea mas oportunidad pa trabao pa esnan capacita pa traha.
- Reevalua sosten financiero y profesional na famianan cu ta cuida di un famia cu incapacitacion fisico y/o mental.

Solucion pa problemanan di mama o tata soltero(a):

- Nos lo introduci un proyecto pa yuda mama o tata soltero reintegra den mercado laboral.
- Percura pa e mama o tata soltero(a) tin sosten pa lanta su yiu, den diferente forma: cuidu despues di scol pa yiu, 'bijscholing' pa e.o. e mama, e tata y e yiu pa evita cu nan ta keda sin subi e otro nivel den bida, guia financiero pa famia pa entre otro siña e famia con pa biba den su Budget.
- Lo reevalua sistema di onderstand pa stimula mama o tata soltero pa reintegra den e mercado laboral, y tene esaki pendiente.
- Lo brinda asistencia pa e mama o tata soltero por yega na su propio cas.

Solucion pa problemanan di famia:

- Fortifica e nucleo familiar y conscientisa famianan pa traha tempo pa e bida familiar, pasobra famia ta e base di comunidad.
- Yega na un convenio cu e instancianan concerni pa crea un programa pa integracion familiar teniendo na cuenta e constelacion familiar.
- Combati violencia domestico y aplica castigonan severo, na mes momento brinda proteccion na miembronan di famia den peliger; brinda ayudo na e agresor na forma efectivo pa evita ripiticion. Pa e motibo aki e instancianan concerni mester haya ayudo real pa por funciona como debe ser.

Solucion pa problemanan di nos adultonan mayor:

- Tuma pasonan necesario pa sigura continuidad di e fondo di Seguro di Biehes ("AOV"), cu ta e fuente di entrada principal di e gran mayoría di nos grandinan.

- Percura pa un cuidu digno pa nos adultonan mayor den casnan di cuidu, y pa esnan cu ta biba na cas; reevalua e maneho di subsidio, y introduci posibilidad di subsidio pa e adultonan mayor cu ta biba na cas
- Cuidu medico di calidad y adecua pa adultonan mayor en general, sin discriminacion di edad; Aruba tin mester di mas geriatría pa brinda e cuidu di salud di calidad na nos adultonan mayor.
- Haci mas uzo di experticio y conseho di adultonan mayor den directiva di fundacionnan y stimula participacion riba mercado laboral di adultonan mayor cu por sigui traha despues di edad di pensioen.
- Traha un comision di supervision pa supervisa tur e lugarnan cu ta brinda cuidu na adultonan mayor, y apunta adultonan mayor tambe den e comision aki.
- Institui un procedura y apunta un comision pa atende cu casonan di abuso di adultonan mayor, tambe na hospital.
- Institui un Consejo di Adultonan Mayor ('ouderenraad'), cu ta conseha Gobierno riba tur tema relaciona cu e problemanan y e bienestar di mayornan adulto den nos comunidad.
- Reduci e peso fiscal riba adultonan mayor, eliminando belasting riba pensioen di biehes (AOV-uitkering), y reduciendo e prima di AZV cu e pensionado mester paga por medio di un 'gliding scale', cual lo brinda beneficio financiero na esnan cu aparte di nan pensioen di biehes, tin otro entrada.
- Den departamentonan di gobierno, banconan, etc. crea fila separa pa adultonan mayor por wordo yuda cu preferencia.
- Aumenta conscientisacion pa nos hobennan respeta adultonan mayor.

Nos compromiso ta pa mehora calidad di bida di esnan mas vulnerabel den nos comunidad, specialmente nos muchanan, hobennan, mayornan soltero y nos adultonan mayor.



UN MIHOR FUTURO PA NOS HOBENNAN

Nos hobennan tin hopi preocupacion pa enseñansa, recreacion sano y oportunidad pa trabao. Ningun di esakinan a haya su debido atencion durante e gobernacion actual. Hobennan profesional ta preocupa ademas con ta bay paga e debe en conexion cu nan estudio avanza; esaki ta un peso y cu gobierno lo por duna un alivio den esaki. E ta un hecho cu graduadonan ta cuminsa den "rood" debi na fianza di estudio. E debe ta den euro y e koers ta varia. Esaki ta un di e motibonan tambe pakico nos yiu di tera profesionalnan ta evalua hopi prome cu bin Aruba bek pa traha despues di termina nan estudio. Tambe tin keho cu DUO (antes IBG) no ta administra bon y como consecuencia ta manda aanmaningen y deurwaarder pa nos hobennan profesional sin mester ta necesario. Otro preocupacion di esnan cu tin un HBO of WO diploma, no ta haya reconocimiento salarial cu ta coresponde cu nan estudio, cual den mayoria di caso ta e motibo cu nan ta keda traha den exterior caminda si ta reconoce e diploma. Finalmente hobennan kier mas proteccion laboral y mas posibilidad pa recreacion.



Solucion pa un mihor futuro pa nos hobennan:

- Enseñansa, crea mas posibilidad pa estudio o curso, entre otro na Universidad di Aruba, cu ta necesario den cuadro di nos mercado laboral.
- Atende cu e problema di 'drop outs', introduci un manera di controla e casonan aki y introduci un programa di educacion of cursonan pa e hobennan aki.
- Introduci un centro pa mucha y hobennan cu problemanan social y criminal.
- Prohibi benta di alcohol na menornan di edad y persigui violadonan cu man duro.
- Mas recreacion sano pa hobennan, entre otro deporte, arte, musica.

Solucion pa alivia e preocupacionnan di hoben profesionalnan ("young professionals")

- Yega na areglo pa por alivia e peso di e fianza di estudio.

- Prepara un plan di empleo riba termino cortico y termino largo, ya prome cu scohe e rumbo di estudio, conoce e posibilidadnan di trabao na Aruba; esaki mester wordo actualisa regularmente y mester wordo comparti cu e.o. Arubahuis na Hulanda.

- Implementa un incentivo pa laga nos profesionalnan bolbe bek Aruba.

- Yega na acuerdonan cu gobierno Hulandes pa establece un sucursal di DUO aki na Aruba mescos cu tin na Curacao, pa por controla DUO mas mihor y facilita e proceso di pago.

Nos hobennan ta nos futuro, un futuro cu nos mester construi hunto.

MEHORA CUIDO DI SALUD

Cuido di salud di e ciudadano a bay atras considerablemente, y e confianza den nos cuida di salud ta menos. Nos institucionan cu mester brinda servicio di salud ya no por cu e demanda debi na crecimiento di nos poblacion. E realidad cu nos ta bibando aden awor ta cu un pashent mester warda varios luna pa haya cita cu su specialista, y algun no ta logra warda asina tanto y ta perde e lucha cu nan malesa prome cu e dia di nan cita yega.

Pa nos di partido MEP salud di hende y sigur bida di hende no tin prijs. Nos ta consciente cu un pais cu ta respeta su mes, mester brinda un cuida di salud digno na su ciudadanonan, y cu esey nos ta compromete: mehora e calidad di cuida pa un y tur. Prevencion y movicion ta e yabi.

Solucion pa problemanan den cuida di salud:

- Mas dokter di cas y specialista pa cada ciudadano haya e oportunidad di un atencion medico specialisa y rapido, y amplia e cantidad di enfermeronan y persona cu ta traha den e area di.

cuida, y brinda nan condicionnan di trabao atractivo; soluciona e problema di nos studiantenan di medicina cu ta studia den region cu nan diploma no ta wordo reconoci.

- Enfoca mas riba PREVENCIÓN, a traves di movicion y alimento saludable, y introduci check up obligatorio por ehempel na pia di trabao, den seleccion nacional di deporte, pa detecta cualkier enfermedad na tempo.

- Ekipa y enforsa e departamento di "Inspeccion" pa garantiza un bon nivel di calidad di cuida y implementa standardnan halto den e calidad di e cuida medico.

- Mas Centro Medico y di Diagnostico riba nos isla pa duna asistencia medico inmediatamente, cuminsando cu upgrade Centro Medico San Nicolas y haci'e un hospital; riba termino largo mester tin un Centro Medico y di Diagnostico den cada districto, cu posibilidad di haci dialisis y asina trece e cuida medico mas cerca di e ser humano.

- Expande cuida di enfermedadnan mental y amplia capacidad di cuida di e pashentnan.

• Atende cu e problematica di e malesa cancer y haci investigacion dicon e índice ta asina halto na Aruba y traha cu mas enfasis riba prevencion y combatimento di e malesa aki.

• Duna mihor asistencia na esnan den necesidad cu material y remedi pa enfermonan.

• Reevalua e sistema di tratamiento medico den exterior, pa brinda un mihor trato y na mes momento baha gasto.

• Restructura costo di cuidado di salud y modifica e sistema di AZV, caminda ta necesario ta baha gasto, pero esaki no por afecta e calidad di cuidado di salud di e ser humano y cambiando e enfasis na cuidado di salud curativo pa cuidado di salud preventivo.

• Maneho responsabel riba uzo di remedi generico y no-generico den caso di pashentnan cu malesa cronico, cu mester haci uzo di remedinan no-generico p'asina garantiza e salud di nos poblacion den 15 aña y mas.

• Promove Aruba como centro di referencia medico, creando un centro multidisciplinario cu ayudo di hospitalnan di renombre internacional. Aki nos por brinda servicionan specialisa manera tratamiento di malesanan cardiovascular, tratamiento di cancer, centro di tratamiento y/o cirugia estetico, centro odontologico. Tur esaki lo contribui na crea un pilar economico nobo, turismo medico, y lo genera entrada pa nos pais.

• Separa cuidado di salud di nos grandinan di cuidado di salud general.

Nos compromiso ta pa mehora calidad di cuidado di salud, y riba salud di hende, ni riba bida di hende tin un prijs.

COMBATI ADICCION

Aruba a conoce un crecemento den e problema cu ta ser categorisa bao di adiccion. Nos ta papia di adiccion ora un persona no por sin uzo di e substancia cu e ta adicto na dje. Adiccion ta wordo expresa na diferente forma, algun mas molesto pa nos comunidad, y algun menos molesto. Pero e problema di adiccion ta uno serio, y mester wordo ataca. Den e ultimo 4 añanan nos no a mira un mehoracion.

Nos ta realisa cu e realidad y na mes momento e dificultad pa trata un adicto, ta cu e solucion ta cuminsa cerca e individuo. E adicto tin di dicidi prome cu e kier wordo trata y haya solucion pa su malesa. Esaki ta encera cu e adicto mester ta dispuesto pa ricibi guia, cuidado y tratamiento pa su malesa, y nos lo percura pa e adicto ricibi e ayudo, guia y tratamiento cu e mester.

Solucion pa problemanan di adiccion:

• Amplia PREVENCIÓN riba un nivel mas halto ainda, pasobra nos ta kere cu prevención ta e yabi pa evita cu nos tin futuro adiccionan, enfocando riba e famia, recreacion sano, sea arte o deporte, di e hobennan, brinda asistencia real na mayor soltero y famianan den dificultad, pa cubri nan necesidadnan familiar y enfoca mas riba conscientisacion di e problema di tur tipo di adiccion for di edad trempan caba.



• Educa y emplea profesionalnan den e ramo y percura pa tur material y espacio pa nan por traha na un forma respetabel y profesional. Tambe lo revisa nan beneficionan secundario den e ramo di trabao aki.

• Crea centronan adecua pa brinda e guía y tratamiento cu cada adicto mester, por ehempel

- separando esnan cu ta pa prome biaha a cay den e problema aki, for di e "double trouble" nan

- introduci un Centro pa esnan cu problema mental, y cu no tin un caminda specifico unda nan por forma parti y tin un bida riba un nivel humano.

- restructura OPC unda muchanan menor di edad lo haya un mihor guia y sosten pa evita cu nan ta sigui den e ciclo.

- Nos lo introduci un centro pa famianan den adiccion, unda cu nan por biba y rehabilita na mes tempo. Asina evita cu e yiunan lo bira victima y cay den e ciclo di adiccion; si mester, nos lo cera convenionan cu institucionnan den exterior pa rehabilitacion.

• Nos lo adapta e leyman y aumenta castigo pa traficacion y uzo di droga riba caya, den barnan, den centronan nocturno y scolnan. Nos lo adapta leyman di droga pa aumenta castigo pa narcotraficantenan y nan complicenan.

• Nos lo crea un plataforma pa tur departamento di gobierno cu ta trata cu e problema di adiccion, un red /netwerk di departamentonan social, hudicial, enseñanza y salud, pa evita cu un persona ta perde den e sistema. E problema aki ta trata diferente disciplina, por ehempel, un trahado social ta atende un famia, den e famia tin problema cu adiccion, e problema ey tin di wordo treci den un plataforma nacional pa cada disciplina por atende cu e caso riba nan turno y p'asina e caso no muri te na ayudo social.

Nos lo lucha pa yuda cada adicto kibra cu nan adiccion, y preveni cu mas hoben ta cay den adiccion.



INFRASTRUCTURA Y MEDIO AMBIENTE SOSTENIBEL

Un di e basenan importante pa un desaroyo economico social duradero ta bo condicion di infraestructura fisico of teritorial. Un calidad halto di bo infraestructura fisico ta un condicion vital cu ta sirbi pa eleva un calidad di bida halto pa nos pueblo den futuro. Mirando cu como isla nos areanan espacial ta limita y nos desaroyo economico, social, demografico a pone hopi presion ariba e parti fisico di nos isla, nos partido a introduci den añanan anterior e ley di ordenansa teritorial di espacio. Cu e introduccion di e ley aki nos a adresa e problemanan fisico den forma integral y multidisciplinario. Den e ley aki a bin cu un plan di ordenanza teritorial cu a stipula unda por permiti actividad economico, unda ta traha cas, unda ta proteha naturalesa, unda por traha hotel y cual beachnan mester keda proteha. Den e plan aki a purba di haya un balance entre actividad economico social y espacial. Lamentablemente durante añanan cu a pasa e gobierno actual no a sigui traha riba e ley aki na unda ta stipula cu mester bin tambe cu plan detaya pa areanan di Aruba.

Meta di e vision di MEP ta pa evita actividadnan conflictivo den bario. Pa por logra esaki lo mester ekipa y optimalisa tur e departamentonan cu ta di importancia pa logra esaki. Den e maneho nobo di nos partido pa añanan 2013-2017, nos lo tuma como punto di salida un maneho duradero den tur e areanan cu tin relacion cu nos maneho teritorial y riba infraestructura. Pa e area di centro di ciudad di San Nicolas nos tin e firme proposito pa concentra actividadnan comercial den e parti mas pabao di Caya Grandi pa crea un ambiente sano, caminda famianan kier bishita, keiro y haci compra, y separa e area aki di e area di e barnan, mientras ta busca un solucion duradero pa e situacion aki. Finalmente maneho di partido MEP ta dirigi den baha gastonan di operacion di gobierno, y lo continua cu e plan cu a inicia den Gabinete Oduber pa construi edificionan di Gobierno pa ubica departamentonan di gobierno, y asina ta menos dependiente di huurmento di edificio.

Solucion pa e problema di ordenansa territorial y otorgamento di tereno:

- Fortifica e departamentonan cu ta trata cu infraestructura y nan personal, ekipa e departamentonan pa por analisa y adapta e plan di teritorio espacial den cuadro di un desaroyo sostenibel.
- Finalisa e asina yama 'bestemmingsplan' of e plan di desaroyo pa districto cu instruccjonnan pa tur e regionnan manera cu ley ta prescribi.
- Adapta y introduci un maneho pa otorgamento di tereno mas efectivo pa e ciudadano teniendo na cuenta cu nos espacio pa duna tereno ta limita.
- Evalua e posibilidad di bende tereno na comerciante, enbes di otorga esaki den erfpacht, cu ta un pago mucho mas abao.
- Ekipa Directie Landmeetkunde pa por midi terenonan publico y priva mas liher.
- Optimalisa e registro di data di Kadaster den forma digital.
- Reafirma cu e area den vecindario di Alto Vista/Urirama ta area destina pa naturalesa, y cu lo no altera e naturalesa pa un parke di molina di biento.

Solucion pa edificacion di gobierno:

- MEP lo continua cu e plan di construi edificacion propio p'asina, riba termino largo, no mester depende di huur edificio pa departamentonan di gobierno y pa baha e gastonan di huur.
- Tur contracto di huur, o prolongacion di contracto di huur, si esaki resulta necesario, lo pasa via un destaho publico den cual tur interesado por participa.

Solucion riba prioridad di maneho di caretera y infraestructura.

- Camindanan cu ta den hopi mal condicion lo haya prioridad pa pone asfalt, y trottoir.
- Lo construi mas caminda pa bicicleta por core, y pa hende por cana.
- Stimula contratistanan local pa participa na momento di otorga obra di caretera y edificio, dunando preferencia na companianan estableci na Aruba, y mester introduci criteria cla pa drechamento di caretera a base di WIF.
- Drechamento di rioolering den barionan na unda tin necesidad.

- Habri mas plan di parcelacion particular pa stimula nos economia.
- Evaluacion di e circulacion di trafico di e posibel 'ringwegen' pa facilita e fluho di trafico.
- Piernan den mal condicion lo wordo repara y pier nobo lo wordo construi.
- Edificionan di Gobierno lo wordo someti na un programa riguroso di mantencion.
- Construi mas facilidad pa por core bicicleta.

Solucion riba prioridad di maneho di sushi y dump:

- Evalua e facilidadnan na Parkietenbos y tuma decision ki direccion Aruba lo tuma den procesamento di sushi riba termino cortico; mester para e kimamento di sushi riba dump inmediatamente y busca otro alternativa.
- Profesionalisa Serlimar y elimina influencia politico.
- Introduci maneho di medio ambiente riba e cultura turistico.
- Un Aruba Limpi, y pa logra esaki mester activa y implementa ley-nan existente relaciona cu tene limpieza di nos pais, incluyendo maneho pa elimina autonan bandona, higiena rond di cada cas y sancionnan pa esnan cu ta viola esakinan.
- Conservacion di naturalesa pa futuro generacionnan, y duna atencion na e problema di boa, programa educativo di conservacion pa nos muchanan na scolnan, sosten na instancianan cu ta promove conservacion di e naturalesa di Aruba, introduci ley-nan di proteccion di naturalesa mas estricto.

Solucion pa cu prioridad di maneho di vivienda y huur:

- Debi cu e gobierno actual no a traha cas di pueblo, mester cuminsa traha cas di pueblo urgentemente pa esnan di mas necesidad; pa por haci esaki Gobierno mester soluciona e problema cu e tin cu pago di huursubsidie atrasa na FCCA.

Solucion pa cu prioridad pa plataforma di desaroyo duradero:

- Introduci un comision cu lo supervisa tur e departamentonan di infraestructura pa yuda nan pone enfasis riba un desaroyo sostenibel. Participantenan ta consisti di comercio, universidad y expertonan.

Nos ta kere den un maneho di infraestructura sostenibel, poniendo e necesidadnan di e ser humano central.



TRANSPORTE Y COMUNICACION CONFIABEL

Pa por atrae inversionista di exterior, Aruba mester por brinda conexion digital confiabel y rapido. Esaki mester haya mas atencion durante e siguiente gobernacion. Compania SETAR, patrimonio nacional, lo keda den man di pueblo di Aruba, y lo haci inversionnan necesario pa optimalisa e servicio. Internet gratis na tur scol lo bira un realidad.

Transporte mester haya mas atencion den e siguiente gobernacion. Nos no conoce un transporte publico adecuado, y decisionnan di e gobierno actual pa elimina rutan di busnan grandi, a resulta funesto pa hopi ciudadano cu ta depende di transporte publico pa yega na nan destino. Un ciudadano cu mester di bus na Paradera awor mester cana casi un ora pa yega na un bushalte, y eynan ainda warda mas di un ora pa un bus pasa.

Transporte publico ta keda un tarea di gobierno. Esaki pa garantiza medio di transporte publico eficiente y confiabel pa pueblo. Mirando cu e costonan di transporte ta influencia costo di bida, ta nos compromiso pa busca alternativanan pa e gastonan di transporte. Asina tambe mester mehora e servicio na nos waf y aeropuerto, pa garantiza un transporte confiabel.

Solucion pa comunicacion mas confiabel:

- Converte Aruba den pais chikito lider den tecnologia na mundo door di crea e infraestructura hunto cu partnernan importante den e ramo aki.
- Optimalisa conexion di internet, y haci esaki mas rapido; e proyecto di kabel atraves di cual lo transporta e hidro energia for di continente Sur Americano, lo brinda e posibilidad tambe di haci e conexion di internet mas rapido.
- Percura pa tur scol haya internet pornada.
- Construi un "Centro Digital" den area di scolnan na San Nicolas, pa tur alumno por haya conexion di internet y na mundo digital gratis, specialmente despues di scol. E centro aki ta habri pa tur hende cu talbes pa motibonan di recurso no tin acceso na computer y internet na nan cas.
- Introduci un 'Media wet' na Aruba, pa garantiza obhetividad di medionan di comunicacion na Aruba.

Solucion pa un transporte mas confiabel:

- Trece inversionista pa realoca nos Waf y desaroya nos "Zona di Actividad Logistico" na Barcadera cual ta trece entrada pa gobierno, experticio/ know-how, crea cupo di trabao, baha prijs di producto pa nos pueblo, y como condicion lo stipula cu nan mester participa financieramente den e fondo pa empleo y educacion, y pa nos studentenan haya training/ know-how den e empresanan aki.

- Stimula e registro di avionnan, bao mesun tipo di condicion, y cera mas acuerdonan bilateral pa por registra mas avion y crea mas entrada.

- Cambionan realiza den Arubus NV ultimo tempo lo wordo evalua y unda cu mester wordo coregi na bienestar di pueblo pa percura pa mehora e transporte publico di parti di Arubus y autobusnan.

- Lo evalua henter e maneho di transporte publico pa loke ta trata maneho, eficiencia y control di permiso a base di un 'mobiliteitsplan' integral, moderno y transparente.

- Introduci transporte liber pa esnan cu ta biba di onderstand y studentenan di menos recurso.

- Mehora servicio di nos wafnan y aeropuerto.

- Introduci un servicio di taxi economico den oranan di anochi, pa evita cu esnan cu a bebe no stuur.

DESAROYA DEPORTE

Un hecho importante a sali di investigacion haci pa sra. van der Wal cu ta indica cu hopi hoben ta cay den criminalidad pa falta di recreacion sano cerca di nan cas. Pesey nos mester bin cu programanan recreativo, y stimula deporte escolar for di cual bo ta mira e talentonan scondi cu Aruba tin. Tambe mester reinstitui IDEFRE y pone traha na bienestar di deporte escolar y movecion saludabel pa Aruba completo. Nos lo renegosha e contracto cu gobierno a firma pa cu Lotto pa Deporte, y den cual a entrega nos loteria nacional na Canada, y tuma bek nos loteria di pueblo. E ganashi genera pa FLPD lo bay bek den deporte. Tur organizacion deportivo, scolnan y hasta organizacionnan cultural, social y educacional sin distincion lo mester por conta atrobe ariba un aporte financiero y material di Lotto pa deporte.

Solucion pa yega na un programa recreativo: movecion mas accesibel pa un y tur:

- Construi canchanan multifuncional den diferente bario.
- Activa Centronan di Bario pa brinda recreacion sano pa chikito y grandi, cu programa di beca deportivo y cultural den bario.
- Traha riba mas camindanan pa cana, core na pia y core bicicleta.
- Promove movecion pa grandinan bao encargo di personanan diploma.
- Promove instancianan cu ta traha cu deporte pa esnan deshabilita y personanan special.

Solucion pa problemanan den deporte escolar:

- Introduci categoria A y B, pa esnan cu ta participa den A ta esnan cu ya ta practicando e deporte den un organizacion oficial y esnan den categoria B pa esnan cu no ta inscribi den ningun club.
- Brinda scolnan mas material pa por practica deporte y movcion sano, ademas di un gymzaal adecuado.
- Tur scol mester tin un docente di deporte, unda cu e persona aki ta responsabel pa tur actividad di deporte y movcion.
- Reintroduci Olimpiada escolar y promove tur scol participa y cu e premionan mester ta mas atractivo.
- Restructura instituto deportivo IBISA y dividi esaki den dos seccion: seccion di deporte escolar y seccion pa salud y movcion sano.
- Scolnan mester bay hunga un rol importante den movcion y comemento saludabel. Mester crea un curiculo pa full scol pa sa pakico y con por mantene bo mes sano y e 'speelplaatsen' mester tin e infraestructura pa tin diferente wega cu hobennan por hunga den pauze.

Solucion pa deporte organisa, federacion y organisacionnan deportivo:

- Gobierno mester traha mas cerca cu e organisacionnan deportivo, y percura cu cada organizacion ta uno democratico unda miembronan di nan directiva ta cambia segun nan statuut y unda tur e miembronan cu ta practica e deporte encuestion sinti nan mes representa.
- Nos seleccionnan nacional mester ta den movcion henter aña y mester duna nan sosten financiero, ademas di nan doño di trabao pa por representa Aruba dignamente.
- Promove e lidernan deportivo, entrenadornan etc. cu cursonan via e federacionnan mes. Mas entrenador bo tin cu tin diploma, ta yuda hisa e nivel di bo deporte.
- Canchanan deportivo existente lo mester haya nan ayudo pa mantencion pero tambe e upgrade necesario manera iluminacion.
- Construi un 'track and field' pa San Nicolas pa practica atletismo, y construi un piscina Olimpico na Noord.
- Atencion pa cuidio medico special pa nos atletanan.
- Guia nos hobennan pa nan por drenta scolnan na otro paisnan unda nan por sigui studia y practica deporte.
- Stimula weganan interinsular.
- Asigna un tereno profesional suficiente grandi pa por crea diferente parke pa deporte extremo, entre otro skate board, motor cross y bike cross.

ENGRANDECE NOS CULTURA

Historia y cultura ta un yabi pa desaroyo sostenibel di un pais. Ultimo añanan nos a mira un tendencia peligroso pa cambia historia di nos pais, specialmente pa cu e lucha pa nos Status Aparte. Gobierno di MEP lo institui un Comision Nacional cu amplio representacion pa publica e historia real riba base científico, cu lo wordo incorpora den curiculo na nos scolnan.

Tur pais desaroya y mayoria pais cu tin turismo como un di su pilar principal di economia, tin un plan nacional di cultura bon stipula. Aruba tambe tin su plan nacional di cultura desde 2006 caba, yama 'Integraal cultuurbeleidsplan'. MEP lo sigui implementa nos plan nacional di cultura manera tabata e caso te cu 2009. Nos meta ta pa hobennan haya oportunidad pa participa gratis riba un escala grandi na actividadnan cultural, p'asina desaroya nan habilidad y talento riba tereno di arte y cultura. Y p'asina logra un pueblo feliz cu tin un satisfaccion grandi di sa kico ta nos identidad, nos idioma, nos cultura y nos historia

Solucion pa haci di cultura e base pa desaroyo social economico di un pais:

- Promove actividadnan cultural den tur skina di Aruba pa conscientisa nos pueblo cu nos cultura y identidad ta primordial pa nos kere den nos mes y pa nos por sigui progresa como hende.
- Propaganda riba nivel nacional via tur medio di comunicacion e amor, e balor y e aprecio pa nos cultura y nos idioma na prome luga, cu respet pa cultura di otro y teniendo cuenta cu nos comunidad multicultural.
- Engrandece conocimiento riba e derechonan humano di cultura.
- Envolve henter nos comunidad multicultural, pa participacion di hoben y adulto den e proceso di cultura, sin importa nacionalidad y duna instancianan cu tin e tarea y responsabilidad pa desaroyo di cultura, un sosten financiero relevante, pa yuda implementa e maneho cultural di Aruba.

Solucion pa eleva e calidad di nos producto cultural:

- Percura pa recurso pa instancianan cultural tin desaroyo continuo den nan trabao.
- Directiva di organisacionnan cultural lo traha den ekipo pa logra un desaroyo sostenibel.
- Instala un Consejo di Cultura (Raad van Cultuur) cu mester revisa implementacion di e maneho cultural y duna feedback na Minister di Cultura, Departamento di Cultura y directiva di organacionnan gubernamental y no-gubernamental.

- Stimula instancianan cultural (e.o. museonan, parke nacional etc), artista y artesanonan pa alcanza un producto cultural turistico a base di identidad propio y cu un calidad di produccion na nivel internacional.

- Planea y ehecuta mas investigacion riba tereno di cultura pa por mehora e calidad y e producto cultural.

- Duna atencion na e Dianan Internacional riba tereno di Cultura y Naturalesa, y pone mas enfasis na nos fiestanan cultural nacional, cuminsando na scol.

- Introduci den e centronan di bario, un sistema di actividanan cultural cu guia special pa hoben, tambe pa tin espacio pa artistanan cu experiencia y expertonan local, regional y internacional traha cu hoben den proyectonan despues di scol, manera e proyectonan Arte di Palabra y Gang di Arte.

- Duna sosten na scolnan di musica pa crea mas musicantenan pa di e forma aki enrikece y engrandece nos cultura musical.

- Garantisa continuacion di iniciativanan particular, por ehempel di Festival di Dande, Festival di Himno y Bandera, Fiesta di San Juan Dera Gai etc.

- Amplia e sosten profesional dirigi mas riba e necesidad di nos Centronan di Bario, Clubnan den bario y otro grupo y instancianan cultural.

- Boga pa medio di actividad cultural logra cu tur hoben por ta liber di droga, liber di alcohol, liber di violencia y liber di intimidacion.

- Bin cu campaña di conscientizacion tocante educacion cultural civico riba e aspectonan basico di un pueblo, esta nos norma y balornan, dirigi riba tur hoben y adulto.

- Introduccion di dianan di distrito, a base di un estudio pa fiha e fecha conmemorativo pa cada distrito, y lo wordo celebra cu actividadnan recreativo popular y cu manifestacionnan cultural.

- Institui un Comision Nacional cu amplio representacion pa publica e historia di pais Aruba, specialmente e lucha pa nos Status Aparte, riba base cientifico, cu lo wordo incorpora den curiculo na nos scolnan.

Nos meta ta pa logra cu Aruba na aña 2017, lo tin ciudadanonan responsabel y culto, cu ta contribui na desaroyo sostenibel pa nos comunidad y futuro generacionnan.

UN MANEHO MIGRATORIO MAS HUMANO

Aruba ta un pais cu a wordo forma atraves di decadanan pa inmigrantenan cu a bin for di tur skina di mundo y hunto cu nos Arubianonan a construi nos pais. Integracion ta keda e yabi pa crea un comunidad harmonioso y respetuoso. Den e ultimo añanan e

maneho riba tereno migratorio a laga hopi di desea, caminda practicamente no tabata aplica mucho control. Esnan cu a acudi pa prolonga nan permiso hopi biaha ta wordo confronta cu un proceso complica, intransparente y cu ta cambia frecuentemente.

Partido MEP ta kere den un maneho migratorio mas humano, den cual tin un distincion den tratamiento di e prome permiso y e permisonan subsecuente. Debi na e cifra halto di desempleo actual, e maneho pa otorgamento di prome permiso lo ta mas estricto, pa protehe mercado laboral pa esnan cu ya ta biba na Aruba. Un prome permiso lo wordo otorga solamente y exclusivamente si tin cupo di trabao cu no por wordo yena cu un persona cu ya ta biba na Aruba. Tin espacio pa agilisa y simplifica e proceso di prolongacion.

MEP ta kere den fomenta integracion y lo institui un departamento di Integracion, separa di e departamento di Inmigracion. E departamento di integracion lo brinda sosten na e inmigrante p'asina logra un integracion mas rapido. MEP ta kere den un crecimiento responsabel, na unda por percura pa garantisa cada ciudadano cu ta biba den nos pais un calidad di bida halto. Desde nos Status Aparte nos a habri nos fronteranan pa trahadornan di exterior bin duna nos un man pa desaroya nos economia.

Solucion pa fomenta mas integracion, y un maneho migratorio mas humano, y na mes momento mas controla:

- Implementa un maneho pa integracion di tur esnan cu a scoge pa bin biba y traha na Aruba. Nos idioma Papiamentu, cultura y custumbenan mester ta e base pa cada un participa y forma parti di nos comunidad. Nos norma y balornan tambe mester bira parti di e maneho di integracion.

- Departamento di Integracion lo pone enfasis riba programanan di integracion y na mes momento brinda sosten den traduccion di cartanan, splica procesonan, etc.

- Proceso pa aplica pa permiso y pa paspoort mester bira mas transparente, den cual sosten lo wordo brinda door di e 'centro di apoyo' na e Departamento di Integracion.

- Pasonan lo wordo tuma pa encamina e cambio di e test di idioma pa naturalisacion, mirando cu e idioma Hulandes ta dificil pa esnan cu ta papia Spaño.

- E proceso pa otorgamento di e prome permiso lo wordo revisa p'asina tin un control estricto den e casonan aki; otorgamento di prome permiso ta acopla na cuponan di trabao vacante, despues di a haci tur esfuerso pa yena e cuponan aki cu personanan cu ta bibando na Aruba caba.

- E proceso pa prolongacion di e permiso lo wordo adapta y agilisa, y lo cambia den cierto casonan na prolongacion un bes den cada dos aña; aki ta wordo pensa na casonan cu e circunstancianan a keda igual, mesun doño di trabao, etc.

- Cu e cambio importante aki e trabao di DIMAS lo cambia, y e enfasis lo ta mas riba e control na momento di trata e prome permiso, y control durante temporada di validez di e permiso na pia di trabao
- Lo revisa y adapta e lista di paisnan cu visa obligatorio y encamina e proceso pa elimina paisnan den region di e lista aki
- Aumenta efectividad di e 'Prisma Project' y scolnan acredita caba, pa por garantiza un integracion di alumnonan den nos sistema di enseñansa, sin perhudica e alumno.

- Lo stimula formacion personal y proyectonan multicultural den centronan di bario pa realiza un integracion exitoso

MEP ta kere den un maneho migratorio mas humano, dirigi riba integracion real. Integracion ta indispensable y fundamental pa por tin un comunidad na unda ta reina igualdad y fraternidad.



UN BON RELACION DEN REINO

Desde 1986 cu pais Aruba a logra su status Aparte y despues na 1996 a schrap e fecha di independencia for di Statuut di Reino, e pueblo di Aruba den su mayoria ta na favor pa Aruba keda forma parti di Reino Hulandes. E relacion y aprecio di nos pueblo pa cu e famia di Cas Real, e pueblonan di Hulanda, Curacao, Sint Maarten y islanan BES lo keda e vinculo pa nos sigui traha cu otro den Reino Hulandes.

Den e ultimo 4 añanan partido MEP a sa di surpasa e distanciamento cu por tabata existi entre e partido y cierto politiconan Hulandes. Partido MEP awe ta gosa di respet grandi di politiconan Hulandes den Gobierno, den Eerste Kamer y den Tweede Kamer, como tambe politiconan di Curacao, Boneiro y Sint Maarten. E brugnan cu a wor- do construi a convence Hulanda cu partido MEP ta un partner serio den Reino y cu mester tene cuenta cune.

Partido MEP den historia politico di nos pais a hunga un rol grandi den realiza y construi pais Aruba autonomo den Reino Hulandes. E tarea di MEP tanto den gobierno como den Parlamento semper lo ta pa cuida nos derechonan adkiri, e status autonomo, dignidad y interesnan di nos pueblo. Den nos relacion cu Reino Statuut ta brinda suficiente espacio pa sigui traha cu otro den Reino a base di respet, den forma constructivo cu e pensamiento pa hiba nos pais y Reino Hulandes padilanti.

Respet ta tambe tene cuenta cu e realidad di nos limitenan y nos posicion geografico y situacion geopolitico di nos region. Finalmente respet kiermeen tambe brinda e espacio pa nos pais por emancipa, crece y sigui desaroya.

Partido MEP ta kere den un bon relacion den Reino, basa riba dos principio fundamental:

1. Un relacion a base di respet mutuo, principalmente respetando nos autonomia
2. Un relacion a base di madurez

Solucion pa un bon relacion den Reino

- Traha cu demas partnernan den Reino a base di cooperacion mutuo, y caminda cu ta posibel encamina proyectonan hunto, pa un yuda otro, manera por ta e caso cu e proyecto di e hidro kabel, cu por beneficia e islanan di Curacao y Boneiro tambe.
- Traha a base di transparencia, na soluciona nos propio problemanan sin tin cu bay bati na porta di Hulanda pa soluciona tur problema.
- Exigi den Reino e respet necesario pa nos autonomia, y pa e derechonan di nos ciudadanonan.

ARUBA MERECE MIHOR

LISTA DI PARTIDO *mep*



EVELYN WEVER CROES

#1



CHRIS ROMERO

#2



XIOMARA RIUŽ
MADURO

#3



GUILLFRED BESARIL

#4



ADY THIJSEN

#5



DANGUI ODUBER

#6



EDISON BRIESEN

#7



SHAILINY TROMP LEE

#8



CARL GIEL

#9



MARLON WERLEMAN

#10



ARONDINO CROES

#11



MIREILLE SINT JAGO

#12



ENDY CROES

#13



DANIEL LEO

#14



EDGARD VROLIJK

#15



SETTY CHRISTIAANS
YARZAGARAY

#16



JOE KOOLMAN

#17



LUIGI BERGEN

#18



PAUL GIBBS

#19



FRANCIS JACOBS

#20



GERRIT CROES

#21



STEPHANIE CROES

#22



KAREL MADURO

#23



GERICK CROES

#24



AMY RICHARDS

#25



RUDY RICHARDSON

#26




RONWAYNE KOCK

#27



PATRICK FARRO

#28



GLENBERT CROES

#29